

Breytingatillögur við frumvarp til laga um ráðstafanir í ríkisfjármálum – 200. mál.

1. 2. gr. frumvarpsins verður svohljóðandi:

- a. 2. másl. 2. mgr. orðast svo: Þannig skal fjárhæð barnabóta og skerðingarmörk vegna tekna, sbr. 4. mgr., ákvarðast í hlutfalli við dvalartímann.
- b. 3. mgr. fellur brott.
- c. Í stað orðanna: „Til viðbótar barnabótum skv. 3. mgr. skal greiða“ í 1. másl. 4. mgr. kemur: Greiða skal.
- d. Í stað „2%“ í 5. másl. 4. mgr. kemur: 3%.
- e. Við 4. mgr. bætist nýr málslíður, svohljóðandi: Til viðbótar barnabótum samkvæmt þessari málsgrein skal greiða tekjutengdar barnabætur með öllum börnum yngri en sjö ára á tekjuárinu. Skulu þær árlega nema 61.191 kr. og skal skerðingarhlutfall þeirra vera 3% með hverju barni.

Athugasemdir:

Um er að ræða leiðréttingu á ákvæðinu þar sem m.a. láðist að geta þess að skerðingarhlutfall með hverju barni yngri en 7 ára skyldi vera 3% eins og kveðið er á um í athugasemdum um greinina.

2. b- og c-liðir 3. gr. frumvarpsins falla brott.

Athugasemdir:

Lagt er til að ekki verði gerðar breytingar á ákvæði 68. gr. B um vaxtabætur.

3. Eftirfarandi breytingar verða á 6. frumvarpsins:

- a. Á eftir orðunum „húsnæðis- og bílalanum“ í 1. másl. c. (III.)-liðar 6. gr. frumvarpsins kemur: einstaklinga utan atvinnurekstrar.
- b. 2. másl. orðast svo: Endurútreikningur afborgana og vaxta af þessum sökum skal ekki hafa áhrif á áður ákvarðaðar vaxtabætur eða barnabætur hvort sem er til hækkunar eða lækkunar, nema skattaðili fari fram á endurákvörðun þeirra skv. 2. mgr. 101. gr., eða bætur sem greiddar eru samkvæmt lögum um almannatryggingar.

Athugasemdir:

Láðst hefur að geta þess að átt er við einstaklinga utan atvinnurekstrar auk þess sem lagt er til að endurútreikningurinn hafi ekki áhrif á bætur sem greiddar eru samkvæmt lögum um almannatryggingar.

Við bætast tvö ný ákvæði til bráðabirgða, svohljóðandi:

d. (IV.)

Þrátt fyrir ákvæði 1. másl. 3. mgr. B-liðar 68. gr. skal viðmiðunarhlutfall hámarksvaxtagjalda af skuldum, sem þar er tilgreint, vera 7% við ákvörðun vaxtabóta á árunum 2011 og 2012 vegna tekna, eigna og skulda á árunum 2010 og 2011.

Þrátt fyrir ákvæði 3. másl. 3. mgr. B-liðar 68. gr. skulu hámarksfjárhæðir vaxtagjalda til útreiknings vaxtabóta, sem þar eru tilgreindar, vera 800.000 kr., 1.000.000 kr. og 1.200.000 kr. við ákvörðun vaxtabóta á árunum 2011 og 2012 vegna tekna, eigna og skulda á árunum 2010 og 2011.

Þrátt fyrir ákvæði 1. másl. 4. mgr. B-liðar 68. gr. skal viðmiðunarhlutfall, sem þar er tilgreint, vera 8% við ákvörðun vaxtabóta á árunum 2011 og 2012 vegna tekna, eigna og skulda á árunum 2010 og 2011.

Þrátt fyrir ákvæði 7. másl. 4. mgr. B-liðar 68. gr. skulu skerðingarfjárhæðir eigna að frádregnum skuldum, sem þar eru tilgreindar, vera 4.000.000 kr. og 6.500.000 kr. við ákvörðun vaxtabóta á árunum 2011 og 2012 vegna tekna, eigna og skulda á árunum 2010 og 2011.

Þrátt fyrir ákvæði 11. og 13. másl. 4. mgr. B-liðar 68. gr. skulu viðmiðunarfjárhæðir, sem þar eru tilgreindar, vera 400.000 kr., 500.000 kr., 600.000 kr. og 5.000 kr. við ákvörðun vaxtabóta á árunum 2011 og 2012 vegna tekna, eigna og skulda á árunum 2010 og 2011.

c. (V.)

Við álagningu opinberra gjalda á árunum 2011 og 2012 skal ákvarða mönnum sérstaka vaxtaniðurgreiðslu með eftirfarandi hætti:

1. Sérstök vaxtaniðurgreiðsla skal vera 0,6% af skuldum vegna lána sem tekin hafa verið vegna kaupa eða byggingar á íbúðarhúsnæði til eigin nota, þar með talin kaup á búseturétti samkvæmt lögum nr. 66/2003 og kaup á eignarhlut í almennri kaupleiguíbúð samkvæmt eldri lögum, eins og þær eru í árslok 2010 og 2011. Hjá þeim sem skattskyldir eru hluta úr ári vegna brottflutnings á tekjuárinu skal miða við skuldastöðu eins og hún var fyrir brottflutning.

2. Sérstök vaxtaniðurgreiðsla getur aldrei verið hærri en 200.000 kr. á ári fyrir hvern mann og 300.000 kr. á ári fyrir einstætt foreldri og hjón eða sambýlisfólk sem uppfyllir skilyrði fyrir samsköttun, sbr. 3. mgr. 62. gr., í lok tekjuárs. Hámark sérstakrar vaxtaniðurgreiðslu hjá þeim sem skattskyldir eru skv. 1. gr. hluta úr ári ákvarðast í hlutfalli við dvalartíma á árinu.

3. Sérstök vaxtaniðurgreiðsla skerðist hlutfallslega fari eignir skv. 72. gr., að frádregnum skuldum skv. 1. mgr. 75. gr., fram úr 10.000.000 kr. hjá einstaklingi og 15.000.000 kr. hjá einstæðu foreldri og hjónum eða sambýlisfólki uns hún fellur niður við tvöfalda þá fjárhæð.

4. Sérstök vaxtaniðurgreiðsla að viðbættum vaxtabótum skv. 68. gr. B má ekki vera hærri en vaxtagjöld ársins vegna kaupa eða byggingar á íbúðarhúsnæði til eigin nota, þar með talin kaup á búseturétti samkvæmt lögum nr. 66/2003 og kaup á eignarhlut í almennri kaupleiguíbúð samkvæmt eldri lögum.

5. Sérstaka vaxtaniðurgreiðsla skal greiða með jöfnum hætti og í tvennu lagi hvort gjaldarið fyrir sig 2011 og 2012. Skal fyrri greiðsla ársins fara fram 1. maí og hin síðari 1. ágúst að lokinni álagningu opinberra gjalda.

6. Um rétt til sérstakrar vaxtaniðurgreiðslu gilda að öðru leyti ákvæði 68. gr. B um vaxtabætur eftir því sem við á.

7. Sérstök vaxtaniðurgreiðsla samkvæmt ákvæði þessu telst ekki til skattskyldra tekna.

4. d. liður 11. gr. frumvarpsins verður svohljóðandi:

d. Við 1. mgr. bætist nýr töluliður, svohljóðandi: Af áfengi sem selt er í tollfrjálsum verslunum sem falla undir ákvæði 2. mgr. 104. gr. tollalaga, nr. 88/2005: 10% af áfengisgjaldi skv. 1.-3. tölul.

Athugasemdir:

Um er að ræða leiðréttingu á prentvillu í lagatextanum til samræmis við athugasemdir um greinina.

5. d. liður 13. gr. frumvarpsins verður svohljóðandi:

d. Við 2. mgr. bætist nýr töluliður, svohljóðandi: Af tóbaki sem selt er í tollfrjálsum verslunum sem falla undir ákvæði 2. mgr. 104. gr. tollalaga, nr. 88/2005: 20% af tóbaksgjaldi skv. 1.-3. tölul.

Athugasemdir:

Um er að ræða leiðréttingu á prentvillu í lagatextanum til samræmis við athugasemdir um greinina.

6. c. liður 14. gr. frumvarpsins verður svohljóðandi:

c. Á eftir orðunum „hafa meðferðis“ í 2. mgr. kemur: sbr. þó 4. tölul. 2. mgr. 9. gr.

Athugasemdir:

Um er að ræða leiðréttingu á prentvillu.

7. Breytingar á gildistökuákvæði frumvarpsins.

a-liður 3. gr. öðlast gildi 1. janúar 2012 og kemur til framkvæmda við ákvörðun vaxtabóta og álagningu gjalda á árinu 2012.

Athugasemdir:

Rétt þykir að fresta gildistöku ákvæðisins um eitt ár að fengnum athugasemdum þar um.

10. gr. laganna öðlast gildi 1. janúar 2011 og tekur til skipta á dánarbúum þeirra sem andast þann dag eða síðar, búskipta þeirra sem hafa heimild til setu í óskiptu búi fari þau fram eftir gildistöku laganna, og álagningu erfðafjárskatts á fyrirframgreiðslu arfs vegna erfðafjárskýrslna sem berast sýslumönnum eftir gildistöku laganna.

Athugasemdir:

Hér er lögð til breyting á gildistöku þar sem upp kann að koma það vandamál að skýrsla berst sýslumanni 31. desember 2010 en sýslumaður nær ekki að árita um skiptalok fyrr en í byrjun janúar 2011, t.d. í þeim tilfellum þar sem ágreiningur er um verðmæti eigna.

11.-15. og 17.-20. gr. laganna taki gildi 1. janúar 2011.

Athugasemdir:

Rétt þykir að miða gildistöku ákvæðanna við upphaf ársins 2011.

